

四庫全書

集部

欽定四庫全書

集部

羅昭諫集卷二

詳校官司業<sub>臣</sub>納麟寶

檢討<sub>臣</sub>何思鈞覆勘

總校官編修<sub>臣</sub>王燕緒

校對官中書<sub>臣</sub>宋 鎔

謄錄監生<sub>臣</sub>邵世俊

欽定四庫全書

集部二

羅昭諫集

別集類一唐

提要

臣等謹按羅昭諫集八卷唐羅隱撰隱有兩同書已著錄考吳越備史隱本傳云隱江東甲乙集淮海寓言及讒書後集並行于世鄭樵通志藝文畧載羅隱集二十卷後集三卷又有吳越掌記集三卷至陳振孫書錄解題

則甲乙集僅十卷而後集反有五卷又多湘  
南集三卷且注甲乙集皆詩後集有律賦數  
首湘南集乃長沙幕中應用之文隱又有淮  
海寓言及讒書等求之未獲云云據此則不  
特吳越掌記集不傳即淮海寓言讒書二種  
振孫且不得見矣此本為康熙初彭城知縣  
張瓚所刻後有瓚跋云昭諫諸集今不復見  
僅得江東集抄本于邑人素英家嗣後得甲

乙集刻本合而讀之雖全集不獲盡覩窺豹者已得一斑矣蓋出於後人所掇捨非舊帙也所載詩四卷又有雜文一卷詩與毛晉所刻甲乙集合雜文則不知原在何集其湘南集僅存自序一篇列于卷中序謂湘南文失落于馬上軍前僅分三卷而舉業詞祭之文惟諸啓多作于湖南或即湘南集中之遺歟文苑英華有隱秋雲似羅賦一篇蓋即後集

之律賦此本失載則所採亦尚遺漏矣第七  
卷末一篇為廣陵妖亂志前十一篇疑即淮  
海寓言之文也第八卷有兩同書十篇唐志  
著錄其說以儒道為一致故曰兩同似乎讒  
書之外又有此書者其異同則不可考矣隱  
不得志于唐迨唐之亡也梁主以諫議大夫  
召之拒不應又力勸錢謬討梁事雖不成君  
子韙之其詩如徐寇南逼感事獻江南知己

一首即事中元甲子一首中元甲子以辛丑  
駕幸蜀四首皆忠憤之氣溢于言表視同時  
李山甫杜荀鶴輩有鸞臬之分雖殘闕之餘  
猶為藝林所寶重殆有由矣乾隆四十三年  
二月恭校上

總纂官臣紀昀臣陸錫熊臣孫士毅

總校官臣陸費墀

[illegible]



欽定四庫全書

羅昭諫集卷一

唐羅隱撰

賦

秋蟲吟

并序

秋蟲蜘蛛也致身羅網間實腹亦羅網間愚感其理  
有得喪因以賦之

物之小兮迎網而斃物之大兮兼網而逝網也者繩其

金定四庫全書  
卷一  
小而不繩其大吾不爾身之危兮腹之饑兮吁

五言古

空城雀

雀入官倉中所食能損幾所慮徃復頻官倉乃害爾魚  
網不在天鳥網不張水飲啄要自然何必空城裏

庭花

昨日芳艷濃開樽幾同醉今朝風雨惡惆悵人生事南  
戚病不起西子老蕪至向晚寂無人相偎墮紅淚

隴頭水

借問隴頭水年年恨何事全疑嗚咽聲中有征人淚自古無長策況我非深智何計謝潺湲一宵空不寐

江夏酬高宗節

臘雪都堂試春風汴水行十年雖抱疾何處不無情羣盜正當路此游應隔生勞君問流落山下已躬耕

秦中富人

高高起華堂區區引流水糞土金玉珍猶嫌未奢侈陋

卷滿蓬蒿誰知有顏子

思歸行

不畊南畝田為愛東堂桂身同樹上花一落又經歲交  
親益相薄知己恩潛替日開十二門自是無歸計

七言古

酬丘光庭

正月十一日書札五月十六日到來柳吟秦望咫尺地  
鯉魚何處閑徘徊故人情意未疎索次第序述眉眼開

上言二年隔烟水下有數幅真瓊瑰行吟坐讀口不倦  
瀑泉激射琅玕摧壁池蘭蕙日已老村酒蘸甲時幾杯  
鶴齡鴻算不復見雨後簑笠空莓苔自從黃寇擾中土  
人心波蕩猶未迴趙殷合眼拜九列張濬掉舌升三台  
朝廷濟濟百揆序寧將對面容姦回禍生有基妖有漸  
翠華西幸蒙塵埃三川梗塞兩河關大明宮殿生蒿萊  
懦夫早歲不量力策蹇仰北高崔巍千門萬戶扃鎖密  
良匠不肯雕散材君今得意尚如此況我麋鹿悠悠哉

榮衰貴賤目所覩莫嫌頭白黃金臺

江南行

江烟濕雨鮫綃漠漠小山眉黛淺水國多愁又有情  
夜槽壓酒銀船滿細絲搖柳凝曉空吳王臺榭春夢中  
鴛鴦鸕鶿喚不起平鋪綠水眠東風西陵路邊月悄悄  
油碧車輕蘓小小

巫山高

下壓重泉上千仞香雲結夢西風緊縱有精靈得往來

欽軛鼉軒亦顛隕嵐光雙雙雷隱隱愁為衣裳恨為鬢  
暮灑朝行何所之江邊日月情無盡珠零冷露丹墮楓  
細腰長臉愁滿宮人生對面猶異同況在千巖萬壑中

薛陽陶感策歌

平泉上相東征日曾為陽陶歌感策烏江太守會稽侯  
相次三篇皆俊逸喬山殯葬衣冠後金印蒼黃南去疾  
龍樓冷落夏口寒從此風流為廢物人間至藝難得主  
懷抱差池恨星律邦溝僕射戎政閑試渡瓜洲吐伊鬱

西風九月草樹秋萬喧沉寂登高樓老篁揭指徵羽吼  
煬帝起坐淮王愁高飄咽滅出滯氣下感知已時橫流  
穿空激遠不可遏髣髴似向伊水頭伊水林泉今已矣  
因取遺編認前事武宗皇帝御宇時四海怡然知所自  
掃除桀黠似提帶制壓權豪若穿鼻九鼎調和各有門  
謝安空儉真兒戲功高近代竟誰知藝小似君猶不棄  
勿惜喑鳴更一吹與君共下難逢淚

病驄馬



樞上病驄蹄裏裏江邊廢宅路迢迢自經梅雨長垂耳  
乍食菰漿欲折腰金絡銜頭光未滅玉花毛色瘦來焦  
曾聽禁漏驚街鼓慣踏康塵怕小橋夜半雄聲心尚壯  
日中高卧尾還搖龍媒落地天池遠何事牽牛在碧霄  
長短句

芳樹

細萼慢逐風暖香閒破鼻青帝國有心時時漏天意去  
年高枝猶壓地今年低枝已顛顚吾所以見造化之權

變通之理春夏作頭秋冬作尾循環反覆無終已人生  
長短同一軌若使威可以制力可以止則秦王不肯斂  
手下沙丘孟賁不合低頭入蒿里伊人強猛猶如此顧  
我勞生何足恃但願我開素抱傾綠蟻陶陶兀兀大醉  
于清宵白晝間任它是天下是地

羅昭諫集卷一

欽定四庫全書

羅昭諫集卷二

唐 羅隱 撰

五言律

效玉臺體

青樓枕路隅  
壁甃復椒塗  
晚夢通簾押  
春寒逼酒壚  
解吟憐芍藥  
難見恨菖蒲  
試問年多少  
隣姬亦姓胡

秋夕對月



夜月色可掬倚樓聊解顏未能分寇盜徒欲滿關山背  
冷金蟾滑毛寒玉兔頑姮娥謾偷藥長短老中間

輕颺

輕颺掠晚莎秋物慘關河戰壘平時少齋壇上處多楚  
雖屈子重漢亦憶廉頗不及雲臺議空山老薜蘿

雪霽

南山雪乍晴寒氣轉崢嶸鏢却閑門出隨他駿馬行一  
竿猶有計五鼎豈須烹愁見天街草青青又欲生

春居

東風百卉搖舊國路迢迢偶病成疎散因貧得寂寥倚  
簷高柳弱垂露小桃妖春色常無處村醪更一瓢

寒食日早出城東

青門欲曙天車馬已喧聞禁柳搖風細牆花折露鮮向  
誰誇麗景只此是流年不得高飛便回頭望紙鳶

秋晚

宰邑慚良術為文愧壯圖縱饒長委命爭奈漸非夫杯

酒有時有亂離無處無金庭在何處回首一踟躕

秋齋後

浮碧山光冷月明露點勻渚蓮丹臉恨堤柳翠眉顰蟬  
已送行客雁應辭主人蠅蚊漸無况日晚自相親

除夜

官歷行將盡村醪強自傾厭寒思暖律畏老惜殘更歲  
月已如此寇戎猶未平兒童不諳事歌吹待天明

九江早秋

雨過晚涼生樓中枕簟清海風吹亂木巖磬落孤城百  
歲幾多日四蹄無限程西隣莫高唱俱是別離情

秋江

秋江待晚潮客思旆旌遙細雨翻蘆葉高風怯柳條兵  
戈村落破饑餓虎狼驕吾土兼連此離魂望裏銷

秋浦

晴川倚落暉極目思依依野色寒來淺人家亂後稀久  
貧身不達多病意常違還有漁舟在時時夢裏歸

陝西晚思

長途已自窮此去更西東樹色榮衰裡人心往返中別  
情流水急歸意故山空莫忘交游分從來事一同

冬暮城西晚眺

謬忝蓮華幕虛沾柏署官欹危長抱疾衰老不禁寒時  
事已日過世途行轉難千崖蕪萬壑只向望中看

南康道中

弱冠負文翰此中聽廡鳴使君延上榻時輩仰前程丹



桂竟多故白雲空有情惟餘路傍淚沾灑向塵纓

宿彭蠡館

孤館少行旅解鞍增別愁遠山矜薄暮高柳怯清秋病裏見時態醉中思舊游所懷今已矣何必恨東流

早登新安縣樓

關城樹色齊往事未全迷塞路真人氣封門壯士泥草濃延蝶舞花密教鶯啼若以鳴為德鸞鳳不及雞

絕境

絕境非身事流年但物華水梳苔髮直風引蕙心斜凡  
客從題鳳膚音未勝蛙小船兼有槳始與問漁家

城西作

從君無一事終日掩空齋道薄交游少才疎進取乖野  
禽鳴聒耳庭草綠侵階幸自同樗櫟何妨愜所懷

邊夜

光景飄如水流生涯轉似萍雁門窮朔路牛斗故鄉星句  
盡人誰切歌終淚自零夜闌回首算何處不長亭

舊游

良時不復再漸老更難言  
遠水猶經眼高樓似斷魂  
依宋玉宅歷歷長卿村  
今日空江畔相看只酒罇

題方干詩

中間李建州夏汭偶同遊  
顧我論佳句推君最上流  
九霄無鶴板雙鬢老漁舟  
世難方如此何當浣旅愁

韋曲杜處士新居

翠斂王孫草荒誅宋玉茅  
寇餘無故物時薄少深交  
迸

金匱山房詩集卷二  
筍穿行逕饑雛出壞巢小園吾亦有多病近來拋

早秋宿葉隨所居

池荷葉正圓長歷報時彈曠野雲蒸熱空庭雨始寒  
蠅蚊猶得志簟席若為安浮世知誰是勞歌共一歡

題段太尉廟

近甸蒙塵日南梁反正年飄流茂陵苑零落大官楦建  
纛非降楚披圖異錄燕堪嗟侍中血不及御衣前

秋日富春江行

遠岸平如剪澄江靜似鋪紫鱗仙客馭金顙李衡奴冷  
疊千山濶清涵萬象殊嚴陵亦高見歸卧是良圖

昇仙橋

危梁枕路岐駐馬問前時價自友朋得名因婦女知直  
須論運命不得逞文詞執戟居鄉里榮華竟若為

臺城

水國春常在臺城夜未寒麗華承寵渥江令捧杯槃宴  
罷明堂爛詩成寶炬殘兵來吾有計金井玉鈎欄

金史四八  
卷二  
北固亭東望寄默師

高亭暮色中往事更誰同  
水謾矜天濶山應到此窮  
病憐京口酒老怯海門風  
惟有言堪解何由見遠公

封禪寺居

盛禮何由覩嘉名偶寄居  
周南太史淚蠻徼長卿書  
砌竹搖風直庭花泣露疎  
誰能賦秋興千里隔吾廬

靈山寺

晚景聊攄抱憑欄幾蕩魂  
檻虛從四面江濶奈孤根  
幽

徑薜蘿色小山苔蘚痕欲依師問道何處繫心猿

題真娘墓

春草荒墳墓萋萋向虎丘死猶嫌寂寞生肯不風流皎  
鏡山泉冷輕裾海霧秋還應伴西子香徑夜深遊

蘇小小墓

魂依橋李城猶未有人耕好月當年事殘花觸處情向  
誰曾艷冶隨分得聲名應侍吳王宴蘭橈暗送迎

遣興

青雲路不通歸計奈長蒙老恐醫方悞窮憂酒盞空何  
堪離亂後更入是非中長短遭譏笑迴頭避釣翁

傷華髮

舊國迢迢遠清秋種種新已衰曾軫慮初見忽沾巾日  
薄梳兼懶根危鑷恐頻青銅不自見只擬老他人

旅夢

旅夢無遷次窮愁有嘆嗟子鷺金口遠粳米會稽賒漏  
溢纔成滴燈寒不作花出門聊一望蟾桂向人斜



感舊

劍佩孫弘閣戈鋌大將營重言虛有位孤立竟無成丘  
隴茹蕭咽池臺歲月平此恩何以報歸處是柴荆

使者

使者銜中旨崎嶇萬里行人心猶未革天意似難明四  
海霍光第六龍張奉營陪臣無以報西望不勝情

柳江遷客

不是逢清世何由見皂囊事雖危虎尾名勝汨鴛行毒

金史四  
卷二  
霧柳江濶愁雲楚驛長歸時有詞賦一為弔沅湘

途中逢劉知遠

吳楚烟波裏巢由季孟間只言無事貴不道致身閒別  
渚蓮根斷歸心桂樹頑空勞鍾璞意塵世隔函關

亂後逢友人

滄海去未得倚舟聊問津生靈寇盜盡方鎮改更頻夢  
裏舊行處眼前新貴人從來事如此君莫獨沾巾

期徐道者不至

遼鶴虛空語冥鴻未易親偶然來即是必擬見無因霜  
霰窮冬冷杯盤旅舍貧只應薊子訓醉後懶分身

雲中懷友人

臘酒復臘雪故人今越鄉所思誰把盞端坐恨無航  
苑舊游盡龜臺仙路長未知鄒孟子何以奉梁王

思故人

故人不可見聊復拂鳴琴鵲遶風枝急螢藏露草深  
平生四方志此夜五湖心惆悵友朋盡洋洋漫好音

秋日懷孟夷庚

秋葉黃陂下孤舟憶共誰江山三楚界風雨二妃祠  
知已秦貂沒流年賈鵬悲中原正兵馬相見是何時

秋日懷賈隨進士

邊寇日騷動故人音信稀長纓慚賈誼孤塚憶韓非  
曉匣魚腸冷春園鴨掌肥知君安未得聊且示忘機

寄陸龜蒙

龍樓李丞相昔歲仰高文黃閣尋無主青山竟未聞  
夜

船乘海月秋寺伴江雲却恐塵埃裏浮名點汙君

寄易定公乘億侍郎

謝舞仍宮柳高竒世少雙侍中生不到園令死須降班  
秩通烏府尊疊近碧幢昭王有餘烈試為禱迷邦

寄制誥李舍人

梁王握豹韜雪裏見枚臯上客趨丹陛游人嘆二毛門  
間知待詔星動想濡毫一首長楊賦應嫌索價高

秋日寄狄補闕

紅塵擾擾間立馬看南山漫道經年往何妨逐日閒病  
中霜葉赤愁裏鬢毛斑不為良知在驅車已出關

寄蘇拾遺

早歲長楊賦當年諫獵書格高時輩伏言切宦情疎慷  
慨傳丹桂艱難保舊居退朝焚諫草能忘馬相如

寄袁皓侍御

東台失路岐榮辱事堪悲我寢牛衣敝君居豸角危風  
塵慚上品才業媿明時千里芙蓉幕何由話所思

寄大理寺徐郎中

佐棘竟誰同，因思證聖中。  
事雖亡顯報，理合有陰功。  
官緒詵枝老，生涯范甌空。  
幾時潘好禮，重與話清風。

寄侯博士

規諫揚雄賦，遭迴賈誼官。  
久貧還往少，孤立轉遷難。  
清鏡流年急，高槐旅舍寒。  
侏儒亦何有，飽食向長安。

寄徵士魏員外

嘉遁蕪門節，清貧粉署官。  
不矜朝命重，只恨路行難。  
窓



曉雞談倦庭秋蝶夢闌  
羨君歸未得還有釣魚竿

寄禮部鄭員外

樂谷門風大裴王禮樂優  
班資冠雞舌人品壓龍頭  
夜直鑪香細晴編疏草稠  
曾聞潘散騎三十二悲秋

寄金吾李孫常侍

西班牙掌禁兵蘭錡最分明  
曉色嚴天仗春寒避火城  
安危雖已任韜畧即嘉聲  
請問何功德壺關寇始平

寄虔州薛大夫



祝融峰下別二載夢魂勞地轉南康重官兼亞相高海  
鵬終負日神馬肯眠槽會得窺成績幽窓染兔毫

寄剡縣主簿

金庭養真地珠篆會稽官境勝堪長往時危喜暫安洞  
連滄海濶山擁赤城寒他日拋塵土因君擬煉丹

秋寄張坤

庭樹已黃落閉門俱寂寥未知棲託處空羨聖明朝酒  
醒鄉心濶雲晴客思遙吾徒自多感願子只簞瓢

寄許融

多病仍疎拙，唯君與我同。  
帝鄉年共老，江徼業俱空。  
燕冷辭華屋，蟬涼咽晚叢。  
白雲高興許，金屑採芝翁。

除夜寄張達

梅花已著眼，竹葉况粘唇。  
只此留殘歲，那堪憶故人。  
亂離書不達，衰病日相親。  
江浦思歸意，明朝又一春。

初夏寄顧紹宗

江上偶分袂，四迴寒暑更。  
青山無路入，白髮滿頭生。  
郢

浦雁尋過鏡湖蟬又鳴  
憐君未歸日杯酒若為情

寄洪正師

寄蹇渾成跡經年滯杜南  
價輕猶有二足剛已過三雞  
肋曹公忿猪肝仲叔慙會應謀  
避地依約近禪菴

秋居有寄

端居湖岸東生計有無中  
魔處千般鬼寒時百種風  
性靈從道拙心事奈成空  
多謝金臺客何當一笑同

酬高崇節

金史四  
卷二  
舊游雖一夢別緒忽千般敗草湯陵晚衰槐楚寺寒數  
奇常自媿時薄欲何干猶賴君相勉慇懃貢禹冠

送李右丞分司

分曹得洛川讜議更昭然左省曾批勅中臺肯畏權所  
悲時漸薄共賀道尤全賣與清平代相兼值興錢

送沈光侍御赴職聞中

未至應居右全家出帝鄉禮優逢苑雪官重帶臺霜夜  
浦吳潮亂春灘建水狂延平有風雨從此是騰驤

商於驛與于韞玉話別

南朝徐庾流洛下憶同游酒採閑坊菊山登遠寺樓相  
思勞寄夢偶別已經秋還被青青桂催君不自由

哭張博士太常

前輩倏云歿君曾北方格卑雖不稱言重亦難忘諫  
草猶青瑣悲風已白楊只應移理窟泉下對真長

鷺聲

井上梧桐暗花間霧露稀一枝晴復暖百轉是兼非金

屋夢初覺玉關人未歸不堪閒日聽因爾又沾衣

燕

不必嫌漂露何妨養羽毛漢妃金屋遠盧女杏梁高野  
迥雙飛急烟晴對語勞猶勝黃雀在棲息是蓬蒿

鷹

越海霜天暮辭韜野草乾俊通司隸職嚴奉武夫官眼  
惡藏鋒在心粗逐物殫近來脂膩足驅遣不妨難

蝶

漢王刀筆精寫爾逼天生舞巧何防急飛高所恨輕野  
田黃雀慮山館主人情此物那堪作莊周夢不成

螢

空庭夜未央點的度危牆抱影何微細乘時忽發揚不  
思因腐草便擬倚孤光若道通文翰車公業豈長

菊

籬落歲云暮數枝聊自芳雪裁纖蕊密金拆小苞香千  
載白衣酒一生青女霜春叢莫輕薄彼此有行藏

紅葉

不奈荒城畔那堪晚照中  
野晴霜裊綠山冷雨催紅  
游子灞陵道美人長信宮  
等閒俱歲暮搖落意無窮

詠錢

志士不敢道貯之成禍胎  
小人無事執假爾作梯媒  
解釋愁腸結能分睡眠開  
朱門狼虎性一半逐君迴

殘花

已歎良時晚仍悲別酒催  
暖芳隨日薄輕片逐風迴  
黛



歛愁歌扇粧殘泣鏡臺  
綠陰莫矜街終是共塵埃

初秋寄友人

九華曾屏跡  
罹亂與心違  
是處堪終老  
新秋又未歸  
病中芳草歇  
愁裏白雲飛  
樵侶兼同志  
音書近又稀

堠子

終日路岐旁  
前程亦可量  
未能慙面黑  
只是恨頭方  
雅旨逾千里  
高文近兩行  
君知不識字  
第一莫形相

題玄同先生草堂

三首

杳杳諸天路蒼蒼大滌山景輿留不得毛節去應閒相  
府舊知己教門新啓關太平匡濟術流落在人間

其二

先生訣行日曾奉數行書意密尋難會情深恨有餘石  
橋春暖後勾漏藥成初珍重雲間鶴從來不定居

其三

常時憶討論歷歷事猶存酒向餘杭盡雲從大滌昏往  
來無道侶歸去有台恩自此玄言絕長應閉洞門

茅齋

從事不從事養生非養生職為尸祿本官是受恩名時  
態已相失歲華徒自驚西齋一卮酒衰老與誰傾

遁跡

遁跡知安住沾襟欲奈何朝廷猶禮樂郡邑忍干戈華  
馬憑誰問羗塵自此多因思漢明帝中夜憶廉頗

倚櫂

倚櫂聽鄰笛沾衣認酒壚自緣非巨室誰復為窮途樹

解將軍夢城遺御史烏直應齊始了傾酌向寒蕪

五言排律

投宣武鄭尚書二十韻

漢代簪纓盛梁園雉堞雄物情須重德時論在明公族  
大踰開魏神高本降嵩世家唯蹇諤官業即清通翰苑  
論思外綸闈嘯傲中健毫驚綵鳳高步出冥鴻履歷雖  
吾道行藏必聖聰絳霄無繫滯浙水忽西東庾監高樓  
月袁郎滿座風四朝存故事兩地有全功去去才須展

行行道益隆避權辭憲署仗節出南宮雁影相承接龍  
圖共始終自然須作礪不必恨臨戎幕下蓮花盛竿頭  
彈佩紅騎免逢郭伋戰士得文翁人地應無比簞瓢奈  
屢空因思一枝桂已得斷根蓬往事應歸捷勞歌且責  
躬殷勤信陵館今日自途窮

投浙東王大夫二十韻

越嶺千峯秀淮流一派長暫憑開物手來展濟時方舊  
跡蘭亭在高風桂樹香地清無等級天濶任徊翔塵尾

談何勝螭頭筆更狂直曾批鳳詔高已冠鵷行嘯傲辭  
民部雍容出帝鄉趙充推印綬勾踐與封疆水占仙人  
吹城留御史牀嘉賓鄒潤甫百姓賀知章席暖飛鸚鵡  
塵輕駐驕驕夜歌珠斷續晴舞雪悠揚化向棠陰布春  
隨隸萼芳盛名韜不得雄略晦彌彰自媿三冬學未窺  
數仞牆感深惟刻骨時去欲沾裳想望魚燒尾咨嗟鼠  
齧腸可能因蹇拙便合老滄浪題柱心猶壯移山志未  
忘深慙百般病今日問醫王

送汝州李中丞十二韻

羣盜方為梗，分符奏未寧。  
黃巾攻郡邑，白挺掠生靈。  
塵土周畿暗，瘡痍汝水腥。  
一兇雖剪滅，數縣尚凋零。  
理必資寬猛，謀須藉典刑。  
與能纔物論，慎選忽天庭。  
官品尊臺秩，山河擁福星。  
虎知應去境，牛在骨全形。  
舊政窮人瘼，新銜展武經。  
關防秋草白，城壁晚峯青。  
破膽期來復，迷魂想待醒。  
魯山行縣後，聊為奠惟馨。

闕題

前有脫句

葉長春松閣科圓早薤齊雨沾虛檻冷雪壓遠山低竹  
好還成徑桃夭亦有蹊小窓奔野馬閑甕養醯雞水石  
心愈切烟霄分已睽病憐王猛畚愚笑隗囂泥澤浦潮  
平岸江村柳覆堤到頭乘興是誰手好提攜

聖真觀劉真師院十韻

簾下嚴君卦窓間少室峯攝生門已盡混跡世猶逢山  
藪師王烈簪纓友戴顓魚跳介象鱸飯吐葛玄峯紫館  
垂新樁黃輕墮小松塵埃金谷路樓閣上陽鐘野耗鳶



肩寄仙書鳥爪封。支牀龜縱老取箭。鶴何慵別久。曾牽  
念。閑來肯厭重。尚餘青竹在。試為剪成龍。


秋風生桂枝

涼吹從何起。中宵景象清。漫隨雲葉動。高傍桂枝生。漠  
漠看無際。蕭蕭別有聲。遠吹斜漢轉。低拂白榆輕。寥泬  
工夫大。乾坤歲序更。因悲未歸客。長望一枝榮。

投寄韋左丞

赤壁徵文聘。中臺拜却詵。班資衆令僕。曹署轄星辰。幙

被從誰起持綱自此新舉明朝典數封納詔書頻禁樹  
曾搗藻臺烏舊避塵便應酬倚注何處活窮鱗



羅昭諫集卷二

欽定四庫全書

集部

羅昭諫集卷三

詳校官司業<sub>臣</sub>納麟寶

檢討<sub>臣</sub>何思鈞覆勘

總校官編修<sub>臣</sub>王燕緒

校對官中書<sub>臣</sub>宋 鎔

謄錄監生<sub>臣</sub>邵世俊

欽定四庫全書

羅昭諫集卷三

唐 羅隱 撰

七言律

春思

蕩漾春風深似波，惹情搖恨去傿傿。  
燕翻永日音聲好，柳舞空城意緒多。  
蜀國暖回溪峽浪，衛娘清轉遏雲歌。  
可憐戶外桃兼李，仲蔚蓬蒿奈爾何。

清明日曲江懷友

君與田蕪即舊游我於交分亦綢繆二年隔絕黃泉下  
盡日悲涼曲水頭鷗鳥自能齊物理杏花疑欲伴人愁  
寡妻稚子應寒食遙望江陵一淚流

長安秋夜

遠聞天子似義皇偶捨漁鄉入帝鄉五等列侯無故舊  
一枝仙桂有風霜燈歎短燭燒離鬢漏轉寒更滴旅腸  
歸計未知身已老九衢雙闕夜蒼蒼

閑居早秋

槐杪清蟬烟雨餘蕭蕭涼葉墜衣裾噪槎鳥散沉蒼嶺  
弄杆風高上碧虛百歲夢生悲蛺蝶一朝香死泣芙蓉  
六宮誰買相如賦團扇恩情日日疎

七夕

絡角星河菡萏天一家歡笑設紅筵應傾謝女珠璣篋  
盡寫檀郎錦繡篇香帳簇成排窈窕金針穿罷拜嬋娟  
銅壺漏報天將曉惆悵佳期又一年

杜陵秋思

南望商於北帝都兩堪棲托  
兩無圖只聞斥逐張公子  
不覺悲同楚大夫巖畔早涼生  
紫桂井邊疎影落高梧  
一杯綠酒他年憶瀝向清波  
寄五湖

漢東秋思

簾卷雨牀琴瑟秋暫憑前計  
奈相尤塵飄馬尾甘蓬轉  
酒憶江邊有夢游隋帝舊祠  
雖寂莫楚妃清唱亦風流  
可憐別恨無人易獨背殘陽  
下寺樓

感懷

石徑松軒亦自由，謾隨浮世逐飄流。  
驚駘路結前程恨，蟋蟀牀生半夜秋。  
掩耳惡聞宮妾語，低頭須向路人羞。  
誰教小事相催逼，未到青雲擬白頭。

所思

梁王兔苑荆榛裏，煬帝雞臺夢想中。  
只覺惘然悲謝傳，未知何以報文翁。  
生靈不幸台星折，造化無情世界空。  
劃盡寒灰始堪嘆，滿庭霜葉一窓風。



歸夢

陸海波濤漸漸深一迴歸夢抵千金路旁草色休多事  
牆外鶯聲肯有心日晚向隅悲斷梗夜闌澆酒哭知音  
貪財敗陣誰相悉鮑叔如今不可尋

自貽

衰老應難更進趨藥畦經卷自朝晡縱無顯效亦藏拙  
若有所成甘守株漢武巡遊虛軋軋秦皇吞併謾驅驅  
如何只見丁家鶴依舊遼東嘆綵蕪

下第作

年年模樣一般般何似東歸把釣竿  
巖谷謾勞思雨露彩雲終是逐鷓鴣  
塵迷魏闕身應老水到吳門葉欲殘  
至竟窮途也須達不能長與世人看

丁亥歲作

病想醫門渴望梅十年心地僅成灰  
早知世事長如此自是孤寒不合來  
谷畔氣濃高蔽日熱邊聲暖乍聞雷  
滿城桃李君看取一一還從舊處開

春日投錢塘元帥尚父二首

正憂衰老辱金臺，敢望昭王顧問來。  
門外旌旗屯虎豹，壁間章句動風雷。  
三都節已聯翩降，兩地花應次第開。  
若比紫髯分鼎足，未聞餘力有瓊瓌。

其二

征東府幕十三州，敢望非才忝上游。  
官秩已叨吳品職，姓名兼顯魯春秋。  
鹽車顧後聲方重，火井窺來焰始浮。  
一句黃河千載事，麥城王粲謾登樓。

暇日投錢尚父

牛斗星邊女宿間  
棟梁虛敞麗江關  
望高漢相東西閣  
名重淮王大小山  
醴設闢傾金鑿  
落馬歸爭撼玉環  
自慙麋鹿無能事  
未報深恩鬢已斑

病中上錢尚父

左脚方行右臂攣  
每慚名跡汙賓筵  
縱饒吳主容衰病  
爭奈燕臺費料錢  
藜杖已乾難更把  
竹輦雖在不堪懸  
深恩重德無言處  
回首浮生淚泫然

上鄂州韋尚書

往歲先皇馭九州侍臣才業最風流  
文窮典故無餘力俗致雍熙盡密謀  
蘭省換班青作綬柏臺前引絳為韞  
都緣未負江山興開濟生靈校一秋

途中獻晉州孟中丞

太平天子念蒲東又委星郎養育功  
昨日隼旗辭闕下今朝珠履在河中  
樓移庾亮千山月樹待袁宏一扇風  
不及政成應入拜晉州何足展清通

臨川投穆中丞

試將生計問蓬根  
心委寒灰首戴盆  
翅弱未知三島路  
舌頑虛掉五侯門  
嘯烟白飲沉高木  
搗月清砧觴旅魂  
家在碧江歸不得  
十年漁艇長苔痕

鄭州獻盧舍人

海槎閒暇閨風輕  
不是安流不肯行  
雞省露濃湯餅熟  
鳳池烟暖詔書成  
漁籌已合光儒夢  
充印何妨且治兵  
會待兩都收復後  
右圖儀表左題名

出試後投所知

此去蓬壺兩日程當時消息甚分明  
桃須曼倩催分熟橘待洪崖遣始行  
島外音書應有意眼前塵土漸無情  
莫教更似西山鼠啗破愁腸恨一生

投所思

顓頊長安何所為旅魂窮命自相疑  
滿川碧嶂無歸日一榻紅塵有淚時  
雕琢只因勞郢匠膏肓終恐誤秦醫  
浮生七十今三十從此悽惶未可知

徐寇南逼感事獻江南知己

酒闌離思浩無窮  
西望維揚憶次公  
萬里漂零身未了  
一家知契意曾同  
雲遮晉國塵應暗  
路轉吳江信不通  
今日便成盧子諒  
滿襟珠淚墮霜風

逼試投所知

桃在仙翁舊苑傍  
暖烟晴靄撲人香  
十年此地頻偷眼  
二月春風最斷腸  
曾恨夢中無好事  
也知囊裡有仙方  
尋思仙骨終難得  
始與回頭問玉皇



金史卷三  
贈瀉先輩令狐補闕

中間聲跡早薰然阻避釣衡過十年碧海浪高終濟物  
蒼梧雲好已歸天花迎綵服離鶯谷柳傍東風觸馬鞭  
應念淒涼洞庭客夜深雙淚憶漁船

贈夏州胡常侍

百尺高臺勃勃州大刀長戟漢諸侯征鴻過盡邊雲潤  
戰馬閒來塞草秋國計已拚肝膽許家財不為子孫謀  
仍聞隴蜀猶多事深喜將軍未白頭

贈湖州裴郎中

貴提金印出咸秦  
瀟灑江城兩度春  
一派水清疑見膽  
數重山翠欲留人  
望崇早合歸黃閣  
詩好何妨戀白蘋  
自是受恩心未足  
却垂雙翅羨吳筠

贈盧從事

前年帝里望行塵  
記得仙家第四人  
泉暖舊諳龍偃息  
露寒初見鶴精神  
歌聽上榻梁園晚  
夢遶殘鐘汜水春  
知有篋中編什在  
只應從此是經綸

湘中贈范郎

丹桂無心彼此諧二年疎嬾共江潭  
愁知酒盞終難捨老覺人情轉不堪  
雲外鷓鴣非故舊眼前膠漆是烟嵐  
勞歌一奏霜風暮擊折湘妃白玉簪

贈漁翁

葉艇悠揚鶴髮垂生涯空托一綸絲  
是非不向眼前起寒暑任從波上移  
風養長籠秋月裡夢和春雨晝眠時  
逍遙此意誰人會應有青山綠水知

和淮南李司空同轉運員外送韋士赴口

層層高閣舊瀛洲此地須徵第一流丞相近年榮倚望  
重才今日喜遨遊榮持健筆金黃貴恨咽離筵管吹秋  
誰繼伊軀送行句梁王詩好郢人愁

和禪月大師見贈

高僧惠我七言詩頓豁塵心展白眉秀似谷中花媚日  
清如潭底月圓時應觀法界蓮千葉肯折人間桂一枝  
漂蕩秦吳十餘載因循猶恨識師遲

廣陵秋日酬進士臧濟見寄

驛西斜日滿窓蟬獨凭秋欄思渺然數尺斷蓬慙故國  
一輪清鏡泣流年已知世事真徒爾縱有心期亦偶焉  
空媿荀家好兄弟雁來魚去是因緣

酬寄右司李員外

當年憶見桂枝春自此清途未四旬左省望高推健筆  
右曹官重得名人閒攜麗藻嫌秋興靜獵遺編笑過秦  
猶把隋和向泥滓應憐疎散任天真

酬黃從事懷舊見寄

舊游不合到心中，把得君詩意亦同。  
水館酒闌清夜月，香街人散白楊風。  
長繩繫日雖難絆，辨口談天未易窮。  
世事自隨蓬轉在，思量何處是飛蓬。

酬章處士見寄

中原甲馬未曾安，今日逢君事萬端。  
亂後幾回鄉夢隔，別來何處路行難。  
霜鱗共落三門浪，雪鬢同歸七里灘。  
何必新詩更相戲，小樓吟罷暮天寒。

秋日汴州客舍有酬

梁宋追遊早歲同，偶然違別事皆空。  
年如流水催何急，道似危途動即窮。  
醉舞且欣連夜月，狂吟還聚一樓風。  
煩君更枉騷人句，白鳳靈蛇滿袖中。

秋日酬張特立

病寄南徐兩地秋，故人依約亦揚州。  
偶因雁足思閒事，擬棹孤舟訪舊游。  
風急幾聞江上笛，月高誰共酒家樓。  
平生意氣消磨盡，甘露軒前看水流。

縣齋秋晚酬友人朱璣見寄

中和節後捧瓊瓊坐讀行吟數月來只歎雕龍方擅價  
不知頽尾竟空迴千枝白露陶潛柳百尺黃金郭隗臺  
惆悵報君無玉案水天東望一徘徊

答羅衮

崑崙水色九般流飲即神仙憇即休敢恨守株曾失意  
始知緣木更難求鶴原謾欲均餘力鶴髮那堪問舊遊  
遙望北辰當上國羨君歸棹五諸侯



賀淮南節度盧員外賜緋

儉蓮高貴九霄聞  
燦燦朱衣降五雲  
驄馬早年曾避路  
銀魚今日且從軍  
御題綵服垂天眷  
袍展花心透縠紋  
應笑當年老萊子  
鮮華都自降明君

裴庶子除太僕卿因賀

楚珪班序未為輕  
莫惜良途副聖明  
宮省舊推皇甫謐  
寺曹今得夏侯秩  
隨科第臨時貴  
官逐簪裾到處清  
應笑馬安虛巧宦  
四迴遷轉始為卿

錢尚父生日

大昴分光降斗牛興唐宗社作諸侯伊夔事業扶千載  
韓白機謀冠九州貴盛上持龍節鉞延長應續鶴春秋  
錦衣玉食將何報更俟莊椿一舉頭

荀令生日

祥煙靄靄拂樓臺慶續玄元節後來已向青陽標四序  
便從嵩嶽應三台龜銜玉柄增年算鶴舞瓊筵獻壽杯  
自顧下儒何以祝柱天功業濟時才

京口見李侍郎

嗟嗟江柳欲矜春  
鐵瓮城邊見故人  
屈指不堪言甲子  
披風常記是庚申  
別來且喜身俱健  
亂後休悲業盡貧  
還有杖頭沽酒物  
待尋山寺話逡巡

孫員外赴闕後重到三衢

遠山高樹思悠哉  
重倚危樓盡一杯  
謝守已隨徵詔入  
魯儒猶逐斷蓬來  
地寒謾憶移暄手  
時急方須濟世才  
宣室夜闌如有問  
可能全忘未燃灰

湘中見進士喬誦

吳公臺下別經秋，祖厲城邊暫駐留。  
一笑有情堪解夢，數年無處不同遊。  
雲牽楚思橫漁艇，柳送鄉心入酒樓。  
且酌松醪依舊醉，誰能相見向春愁。

鍾陵見進士楊尋

孺亭滕閣少踟躕，三度南游一事無。  
只覺流年如鳥逝，不知何處有龍屠。  
雲歸洪井枝柯斂，水下漳江氣色麤。  
賴得與君同此醉，醒來愁被鬼揶揄。

錢塘見芮逢

蔡倫池北雁峯前離亂相兼十九年所喜故人猶會面  
不堪良牧已重泉醉思把筯敲歌席狂憶判身入酒船  
今日與君贏得在戴家灣裡兩瞠然

魏城逢故人

一年兩度錦江遊前值東風後值秋芳草有情皆礙馬  
好雲無處不遮樓山將別恨和心斷水帶離聲入夢流  
今日因君試迴首澹烟喬木隔綿州

送淮南李司空朝覲

聖君宵旰望時雍  
丹詔西來雨露濃  
楚客歌狂休歎鳳  
武侯才大本猶龍  
九州似鼎終須負  
萬物為銅只待鎔  
臘後春前更何事  
便看經度奏東封

送蕭中丞赴闕

八年刀筆別京華  
歸去青冥路未賒  
今日風流卿相客  
舊時基業帝王家  
彤庭彩鳳雖添瑞  
望府紅蓮已減花  
從此舊寮如有問  
海邊麋鹿斗邊槎

送光祿崔卿赴闕

十年目斷望西轅  
此日殷勤聖主恩  
上國已留虞寄命  
中朝應聽范汪言  
官從幕歸卿寺路  
向干戈見禁門  
鶴侶寂寥曹署冷  
更堪嗚咽問田園

為汴州相公從事

吹臺高倚圃田東  
此去輶車事分同  
珠履舊參蕭相國  
綵衣今佐晉司空  
醉離淮甸寒星下  
吟指梁園密雪中  
到彼的知宣室語  
幾時徵拜黑頭翁

送盧端公歸臺盧校書之夏縣

綿綿堤草拂征輪  
龍虎俱辭楚水濱  
只見勝之為御史  
不知梅福是仙人  
地推八米源流盛  
才笑三張事業貧  
一總西歸一般達  
柏臺霜冷夏城春

送陸郎中赴闕

幕下留連兩月強  
爐邊侍史舊焚香  
不關雨露偏垂意  
自是鴛鴦合着行  
三署履聲通建禮  
九霄星彩應明光  
少瑜今日休遲錦  
從此西垣使鳳凰



淮南送司勳李郎中赴闕

中朝品秩重文章健筆依前賜望郎  
五夜星辰歸帝座  
半年樽俎奉梁王  
南都水煖蓮分影  
北極天寒雁著行  
不必戀恩多感激  
過淮應合見徵黃

淮南送工部盧員外赴任

始從豸角曳長裾  
又吐雞香奏玉除  
隋邸舊僚推謝掾  
漢庭高議得相如  
貴分赤筆升蘭署  
榮著緋衣從板輿  
遙想到時秋欲盡  
禁城涼冷露槐疎

送蘄州裴員外

六枝仙桂最先春，瀟灑高辭九陌塵。  
兩晉家聲須有主，六朝文雅別無人。  
榮驅豹尾拋同輩，貴上螭頭見近臣。  
蘄水蒼生莫相羨，早看歸去掌絲綸。

送鄭州嚴員外

欲將刀筆潤王猷，東去先分聖主憂。  
滿扇好風搖鄭圃，一車甘雨別皇州。  
尚書積冷鴻聲晚，僕射陂寒樹影秋。  
從此文星在何處，武牢關外庾公樓。

送雪川鄭員外

明時塞詔列分麾東擁朱輪出帝畿  
銅虎貴提天子印銀魚榮傍老萊衣  
歌聽茗塢春山暖詩詠蘋洲暮鳥飛  
知有掖垣南步在可能須待政成歸

送朗州張員外

聖朝綸閣最延才須牧生民始入來  
鳳藻已期它日用隼旗應是隔年回  
旗飄峴首嵐光重酒奠湘江杜魄哀  
腸斷秦原二三月好花全為使君開

重送前人

朱輪此去正春風且駐青驄聽斷蓬一榻早年容孺子  
雙旌今日別文翁誠知與善心長在爭奈干時跡轉窮  
酬德酬恩兩無地謾勞惆悵鳳城東

送王使君赴蘇臺

東南一望可長吁猶憶王孫領虎符兩地干戈連越絕  
數年麋鹿卧姑蘇疲民賦重全家盡舊族兵侵大半無  
聊得伍員兼旅寓不妨招取好椰榆

送姚安之赴任秋浦

官罷春坊地象雷片帆高指貴池開五侯水暖魚鱗去  
九子山晴雁叙來江夏黃童徒逞辯廣都龐令恐非才  
到頭稱意須年少贏得時光向酒杯

送內史周大夫自杭州朝貢

八都上將近平戎便附輶軒奏聖聰三變駕前朝覲禮  
一函江表戰征功雲歸閭苑何時見水到瑤池觸處通  
知有殿庭餘力在莫辭消息寄西風

送溪州使君

兵寇傷殘國力衰就中南土藉良醫鳳銜泥詔辭丹闕  
鵬倚霜風上畫旗官職不須輕遠地生靈只是計臨時  
灞橋酒盞黔巫月從此江心兩地悲

送丁明府赴紫溪任

金徽玉軫肯躊躇偶滯長途半月餘樓上酒闌梅折後  
馬前山好雪晴初樂公社在憐鄉樹潘令花繁賀板輿  
縣譜莫辭留舊本異時量度更何如

送臧漬下第後歸池州

賦成無處換黃金，却向春風動越吟。  
天子愛才雖仄席，諸生多病又沾襟。  
柳攀灞岸狂遮袂，水憶池陽綠滿心。  
珍重綵衣歸正好，莫將閒事繫升沉。

送沈光及第後東歸兼赴嘉禮

青青月桂觸人香，白紵衫輕稱沈郎。  
好繼馬卿歸故里，況聞山簡在襄陽。  
杯傾別岸應須醉，花傍征車漸欲芳。  
擬把金錢助嘉禮，不堪棲屑困名場。

送秦州從事

一枝何足解人愁，拋却還須定遠侯。  
紫陌紅塵今別恨，九衢雙闕夜同游。  
芳時易失勞行止，良會難期且住留。  
若到邊庭有來使，試披書尾話梁州。

送宿州傅少府

江籬漠漠樹重重，東過青淮到宿松。  
縣好也知臨皖水，官閑應得看滂峰。  
春晴綠野吳歌怨，雪霽平郊楚酒濃。  
留取餘杯待張翰，明年歸棹一從容。



送宣武徐巡官

傲晚公卿二十年東來西去盡悠然  
白知關畔元非馬玄覺壺中別有天  
漢帝詔銜應異日梁王風雪是初延  
臨行不惜刀圭便愁殺長安買笑錢

途中送人東遊有寄

離驂莫惜暫逡巡君向池陽我入秦  
歲月易拋非曩日酒杯難得是同人  
路經隋苑橋燈夜江轉臺城岸草春  
此處故交誰見問為言霜鬢壓風塵

送友人歸夷門

三年流落大梁城，每送君歸即有情。  
別路算來成底事，舊遊言着似前生。  
壇荒懶認詞人會，門在空憐烈士名。  
至竟男兒分應定，不須惆悵谷中鶯。

送張綰遊鍾陵

南憶龍沙兩岸行，當時天下尚清平。  
醉眠野寺花方落，吟倚江樓月欲明。  
老去亦知難重到，亂來爭肯不牽情。  
西山十二真人在，從此煩君話姓名。

送裴旆歸會稽

金庭路指剡川隈，珍重良朋自此來。  
兩鬢不堪悲歲月，一卮猶得話塵埃。  
家通曩分心空在世，逼橫流眼未開。  
笑殺山陰雪中客，等閒乘興又須迴。

送人歸湘中兼寄舊知

貴溪烟雨九華山，亂後應同夢寐間。  
萬里分飛休掩袂，兩旬相見且開顏。  
君依宰府貂蟬貴，我戀王門鬢髮斑。  
為謝伏波筵上客，幾時金印擬西還。

送人赴職褒中

物態時情難重陳  
夫君此去莫傷春  
男兒只要有知己  
才子何堪更問津  
萬轉江山通蜀國  
兩行珠翠見褒人  
海棠花謝東風老  
應念京都共苦辛

送梅處士歸寧國

十五年前即別君  
別時天下未紛紜  
亂離且喜身俱在  
存沒那堪耳更聞  
良會謾勞悲曩跡  
舊交誰去弔荒墳  
殷勤為謝逃名客  
想望千秋嶺上雲

送臧漬下第謁實鄜州

賦得長楊不直錢却來京口看鶯遷也知絳灌輕才子  
好謁元常醉少年萬里故鄉雲縹緲一春生計淚潺湲  
多情柱史應相問與話歸心正浩然

送顧雲下第

行行杯酒莫辭頻怨嘆勞歌兩未伸漢帝後宮猶識字  
楚王前殿更無人年深旅舍衣裳敝潮打村田活計貧  
百歲都來多幾日不堪相別又傷春

早春送處士張坤歸汴州

蕭蕭羸馬正塵埃又送歸軒向吹臺別酒莫辭今夜醉  
故人知是幾時來泉經華嶽猶應凍花到梁園始合開  
為謝東門抱關吏不堪惆悵滿離杯

東歸別常修

六載辛勤九陌中却尋歸路五湖東名慙桂苑一枝綠  
繪憶松江兩筴紅浮世到頭須適性男兒何必盡成功  
惟慙鮑叔深知我他日蒲帆百尺風

東歸別所知

芙蓉宮闕二妃壇兩處因依五歲寒  
鄒律有風吹不變却枝無分住應難  
愁心似火還燒鬢別淚非珠謾落盤  
却羨淮南好雞犬也能終始逐劉安

撫州別阮兵曹

雲晴天外見諸峯幽輒行輪有去蹤  
內史宅邊今獨恨步兵厨畔舊相容  
十年別鬢疑朝鏡千里歸心著晚鐘  
若不他時更青眼未知誰肯薦臨邛

江亭別裴饒

行杯且待怨歌終，多病憐君事事同。  
衰鬢別來光影裏，故鄉歸去亂離中。  
乾坤墊裂三分在，井邑摧殘一半空。  
日晚長亭問西使，不堪車馬尚萍蓬。

送程尊師之晉陵

棟間雲出認行軒，郊外陰夏木繁。  
高道乍為張翰侶，使君兼是世龍孫。  
溪含句曲清連底，酒貫餘杭綠滿樽。  
莫見時危便乘興，人來何處不桃源。



送程尊師東游有寄

華蓋峯前擬卜耕主人無奈又閒行  
且憑鶴駕尋滄海又恐犀軒過赤城  
絳簡便應朝右弼紫旄兼合見東卿  
勸君莫忘歸時節芝似螢光處處生

送楊鍊師却歸真誥巖

宦途不復更經營歸去東南任意行  
別後幾回思會面到來相見似前生  
久居竹蓋知勤苦舊業蓮峯想變更  
為謝佯狂吳道士耳中時有鐵船聲

送晉光太師

師以草書應制

禹祠分首戴灣逢健筆尋知達九重聖主賜衣憐絕藝  
侍臣搗藻許高蹤寧親久別街西寺銜詔初離海上峯  
一種苦心師得了不須回首笑龍鍾

別池陽所居

黃塵初起此留連火耨刀耕六七年雨夜老農思水旱  
雪晴漁父共舟船已悲世亂身須去肯愧途危跡屢遷  
却是九華山有意列行相送到江邊

奉使宛陵別二三從事

梁王雪裏有深知偶別家鄉隔路歧  
官品共傳勝曩日酒杯爭肯忍當時  
豫章地暖矜千尺越嶠天寒愧一枝  
還有釣魚蓑笠在不堪風雨失歸期

感別元帥尚父

玉函瑤檢下台司記得當年捧領時  
半壁龍蛇蟠造化滿筐山嶽動神祇  
疲牛舐犢心猶切陰鶴鳴鷄力已衰  
穉子不才身抱疾日窺真跡淚雙垂

感德叙懷寄上羅鄴王

三首

舊業傳家有寶刀近聞餘力更揮毫  
腰間印佩黃金重卷裏詩裁白雪高  
宴罷嘉賓吟鳳藻獵迴諸將問龍韜  
分茅列土纔三十猶擬回頭賭錦袍

其二

營室東迴蔭赤丘少年承襲擁青油  
坐調金鼎尊明主橫把琱戈拜列侯  
書札二王爭巧拙篇章七子謝風流  
西園舊跡今應在衰老無因奉勝遊

其三

脉散源分歷幾朝縱然官宦只卑僚正憂未派淪滄海  
忽見高枝拂絳霄百萬貔貅趨玉帳三千賓客珥金貂  
良時難得吾宗少應念寒門久寂寥

魏博羅令公附卷有回

寒門雖得在諸宗棲北巢南恨不同馬上固慙銷髀肉  
幄中猶羨愈頭風蹉跎歲月心仍切迢遞江山夢未通  
深荷吾宗有知己好將刀筆為英雄

寄酬鄴王羅令公

三首

敢將衰弱附強宗，細算還緣血脈同。  
湘浦烟波無舊迹，鄴都蘭菊有遺風。  
每憐離亂書猶達，所恨雲泥路不通。  
珍重珠璣兼繡段，草玄堂下寄揚雄。

其二

水雲開霽立高亭，依約黎陽對福星。  
只見篇章矜鏤管，不知勲業柱青冥。  
早緣入夢金方礪，晚為傳家鼎始銘。  
鶴髮四垂烟閣遠，此生何處拜儀形。

其三

錦笈朱囊連復連，紫鸞飛下浙江邊。  
綃從海室奪烟霧，樂奏帝宮勝管絃。  
長笑應劉非顯達，每嫌伊霍少詩篇。  
戴灣老圃根基薄，虛費工夫八十年。

金陵寄竇尚書

二年岐路有西東，長憶優游楚驛中。  
虎帳談高無客繼，馬卿官傲少人同。  
世危肯使依劉表，山好猶能憶謝公。  
此去此恩言不得，謾將閒淚對春風。

春晚寄鍾尚書

宰府初開奉末塵四年談笑隔通津  
官資肯便矜中路酒盞還應憶故人  
江畔舊遊秦望月檻前公事鏡湖春  
如今莫問西禪塢一炷寒香老病身

得宣州竇尚書書因投寄

雙魚迢遞到江濱傷感南陵舊主人  
萬里朝臺勞寄夢十年侯國阻趨塵  
尋知亂後嘗辭祿共喜閒來得養神  
時見齊山敬亭客不堪戎馬戰征頻



其二

曾逐旌旗過板橋  
世途多難竟蓬飄  
步兵校尉辭公府  
車騎將軍憶本朝  
醉裏舊游還歷歷  
病中衰髻奈蕭蕭  
遺簪墮履應留念  
門客如今只下寮

寄張侍郎

衰羸豈合話荊州  
爭奈恩多不自由  
無路重趨桓典馬  
有詩曾上仲宣樓  
塵銷別迹堪垂淚  
樹拂他門嬾舉頭  
一種人間太平日  
獨教零落憶滄洲

江南寄所知周僕射

曾陪公子醉西園  
峴首碑前事嬾言  
世亂共嗟王粲老  
時危俱受信陵恩  
潮憐把盞吟江徼  
雨憶凭闌望海門  
飛蓋寂寥清宴罷  
不知簪履更誰存

廣陵李僕射借示近詩因投獻

朝論國計暮論兵  
餘力猶隨鳳藻生  
語繼盤盂拋俗格  
氣兼河嶽帶商聲  
閒尋綺思千花麗  
靜想高吟六義清  
天柄已持堯典在  
更堪回首問緣情

秋日泊平望驛寄太常裴郎中

蘋洲重到宿難期  
西倚郵亭憶往時  
北海樽中常有酒  
東陽樓上豈無詩  
地清每負生靈望  
官重方升禮樂司  
聞說江南舊歌曲  
至今猶是唱吳姬

雪溪晚泊寄裴庶子

溪風如扇雨如絲  
閒步閒吟柳惺詩  
杯酒踈狂非曩日  
野花狼籍似當時  
道窮漫有依劉感  
才急應無借寇期  
滿眼雲山莫相笑  
與君俱是受深知

寄鍾常侍

一從朱履步金臺，  
苦水寒奉上台峻，  
節不由人學得。  
遠途終是自將來，  
風高漸展摩天翼，  
幹聳方呈構厦材。  
應笑樟亭舊同舍，  
九州無驗滿爐灰。

寄前宣州竇常侍

往年西謁謝玄暉，  
尊酒留歡醉始歸。  
曲檻柳濃鶯未老，  
小園花煖蝶初飛。  
噴香瑞獸金三尺，  
舞雪佳人玉一圍。  
今日亂離尋不得，  
滿簑風雨釣漁磯。

寄右省王諫議

耳邊要靜不得靜心裏欲閒終未閒自是宿緣應有累  
可能時事更相關魚慚張翰辭東府鶴怨周顒負北山  
看却金庭芝朮老又驅車入七人班

寄鄭補闕

夫子門前數仞牆每經過處憶遊梁路從青瑣無因見  
恩在丹心不可忘未必便為讒口隔只應貪草諫書忙  
別來愁緒知多少兩度槐花馬上黃

寄楊秘書 二首

潮水平來見鯉魚  
偶因烹處得瓊琚  
披尋藻思千重後  
吟想冰光萬里餘  
漳浦病來情轉薄  
赤城吟苦意何如  
錦衣公子憐君在  
十載兵戈從板輿

其二

蕭蕭簷雪打窓聲  
因憶江東阮步兵  
兩信海潮書不達  
數峯稽嶺眼長明  
梅繁幾處垂鞭看  
酒好何人倚檻傾  
會待與君開社瓮  
滿船載月鏡中行

湖州裴郎中赴闕後投寄簡友生

錦帳郎官捧詔年  
汀洲曾駐木蘭船  
欄衡酒醒春瓶倒  
柳憚詩成海月圓  
歌感遠山珠滴滴  
漏催香燭淚連連  
使君入拜吾徒在  
宣室他時豈偶然

寄京闕陸郎中昆仲

柏臺蘭署四周旋  
賓榻何妨雁影連  
纔見玳簪歌細柳  
便知油幕勝紅蓮  
家從入洛聲名大  
跡為依劉事分偏  
爭奈亂離人漸少  
麥城新賦許誰傳

冬暮寄裴郎中

曉髮星星入鏡宜  
早年容易近年悲  
敢言得事時將晚  
只恐酬恩日漸遲  
南國傾心應望速  
東堂開口欲從誰  
仙郎舊有黃金約  
滙膽隳肝更禱祈

寄前戶部陸郎中

出馴桑雉入朝簪  
瀟灑清名映士林  
近日篇章欺白雪  
早年詞賦得黃金  
桂堂縱道探龍額  
蘭省何曾駐鶴心  
罹亂事多人不會  
酒濃花暖且閒吟



寄池州鄭員外

獸遶朱輪酒滿船使君瀟灑貴池邊  
衣同菜子曾分筆  
扇似袁宏別有天  
九點好山樓上客  
兩行高柳雨中烟  
陵陽百姓將何福  
社舞村歌又一年

寄三衢孫員外

小敷文伯見何時  
南望三衢渴復饑  
天子未能崇典誥  
諸生徒欲戀旌旗  
風高綠野苗千頃  
露冷平樓酒滿卮  
盡是數旬陪奉處  
使君爭肯不相思

春日憶湖南舊遊寄盧校書

旅榜前年過洞庭，曾提刀筆事甘寧。  
玳筵離隔將軍幕，珠履頻窺處士星。  
恩重匣中孤劍在，夢餘江上數峰青。  
金貂見鵬嘉賓散，迴首昭丘一淚零。

暇日有寄姑蘇曹使君兼呈張郎中郡中賓僚

嘉樹陰陰覆劍池，此中能政動神祇。  
湖邊觀稼雨迎馬，城外犒軍風滿旗。  
融酒徒誇無算爵，儉蓮還少最高枝。  
珊瑚筆架真珠履，曾和陳王幾首詩。

秋日有寄姑蘓曹使君

多病無因棹小舟  
闔閭城下謁名侯  
水寒不見雙魚信  
風便惟聞五袴謳  
早說用兵長暗合  
近傳觀稼亦閒游  
須知謝奕依前醉  
間阻清談又一秋

寄進士盧休

半年池口恨萍蓬  
今日思量已夢中  
游子馬蹄難重到  
故人樽酒與誰同  
山橫翠後千層綠  
蠟想歌時一燼紅  
從此客程君不見  
麥秋梅雨遍江東

秋夜寄進士顧榮

秋河耿耿夜沉沉往事三更盡到心  
多病謾勞窺聖代薄才終是費知音  
家山夢後帆千尺塵土搔來髮一簪  
空羨良朋盡高價可憐東箭與南金

寄黔中王從事

故人刀筆事軍書南轉黔江半月餘  
別後鄉關情幾許近來詩酒興何如  
貪將醉袖矜鴛谷不把瑤絨附鯉魚  
今日舉觴君莫問生涯牢落鬢蕭疎

寄渭北徐從事

暖雲慵墮柳垂條  
驄馬徐郎過渭橋  
官秩舊叅荀秘監  
尊疊今伴霍嫖姚  
科隨鵠箭頻曾中  
禮向侯弓以重招  
莫恨東風促行李  
不多時節却歸朝

寄喬逸人

南經湘水北揚州  
別後風帆幾度遊  
春酒誰家禁爛熳  
野花何處最淹留  
欲憑尺素邊鴻懶  
未定雕梁海燕愁  
長短此行須入手  
更饒君占一年秋

寄南城韋逸人

杜甫詩中韋曲花至今無賴尚家家  
美人曉折露沾袖  
公子醉歸香滿車  
萬里丹青傳不得  
二年風雨恨無涯  
羨他南澗高眠客  
春去春來任物華

秋日禪智寺見裴郎中題名寄韋瞻

野寺疎鐘萬木秋  
偶尋題處認名侯  
官離南郡應閒暇  
地勝東山想駐留  
百盞濃醪成別夢  
兩行垂露浣羈愁  
心知只有韋公在  
更對真蹤話舊游

寄韋瞻

石城簑笠阻心期，落盡山花有所思。  
羸馬二年蓬轉後，故人何處月明時。  
風催曉燕看看別，雨脇秋蠅漸漸癡。  
禪智闌干橋市酒，縱然相見只相悲。

寄崔慶孫

故人何處又留連，月冷風高鏡水邊。  
文陣解圍纔昨日，醉鄉分袂已三年。  
交情澹薄應長在，俗態流離且勉旃。  
還擬山陰一乘興，雪寒難得渡江船。

寄徐濟進士

往年疎懶共江湖月滿花香記得無  
霜壓楚蓮秋後折  
雨催蠻酒夜深沾紅塵偶別迷前事  
丹桂相輕愧後圖  
出得函關抽得手從來不及阮元瑜

下第寄張坤

謾費精神掉五侯破琴孤劍是身讐  
九衢雙闕擬何去  
玉壘銅梁空舊游蝴蝶有情牽晚夢  
杜鵑無賴伴春愁  
思量不及張公子經歲山池醉酒樓



吳門晚泊寄句曲道友

採香徑在人  
不留採香徑  
下停葉舟  
桃花李花  
關紅白  
山鳥水鳥  
自獻酬  
十萬梅  
銷空寸土  
三分孫策  
竟荒丘  
未知到了  
關身否  
笑殺雷平  
許遠遊

湖上歲暮感懷寄友人

雪天螢席幾辛勤  
同志當時四五人  
蘭版地寒俱受露  
桂堂風惡獨傷春  
音書久絕應埋玉  
編簡難言竟委塵  
惟有廣都龐令在  
白頭樽酒憶交親

秋晚寄友人

洞庭霜落水雲秋，又泛輕漣任去留。  
世界高談今已得，宦途清貴舊曾游。  
手中綵筆誇題鳳，天上泥封獎狎鷗。  
更見南來釣翁說，醉吟還上木蘭舟。

旅舍書懷寄所知

思量前事不堪尋，牢落餘情滿素琴。  
四海豈無騰躍路，一家長有別離心。  
道從汨沒甘雌伏，跡恐因循更陸沉。  
寂寞惟應弔空館，異鄉時節獨沾襟。

秋日有寄

丹青未合便回頭見盡人間事始休只有百神朝寶鏡  
永無纖浪犯虛舟曾臨鐵甕雖分職近得金陵亦偶遊  
東去西來人不會上卿蹤跡本玄洲

夜泊毘陵無錫縣有寄

草蟲幽咽樹初圓獨繫孤舟夜已闌濁浪勢奔吳苑急  
疎鐘聲出慧山寒愁催髣髴髮凋何易貧戀家鄉別漸難  
他日親朋應大笑始知書劍是無端

江邊有寄

江邊舊業半凋殘，每軫歸心即萬端。  
狂折野梅山店暖，醉聽村笛酒樓寒。  
只言聖代謀身易，爭奈貧儒得路難。  
同病同憂更何事，為君提筆畫漁竿。

寄西華黃鍊師

西華有路入中華，依約山川認永嘉。  
羽客昔時留篠簜，故人今又種烟霞。  
壇高已降三清鶴，海近應通八月槎。  
盛事兩般君總得，老萊衣服戴鵝家。

寄第五尊師

苔溪烟月久因循野鶴衣裘獨蠶綸只說泊船無定處  
不知攜手是何人朱黃揀日囚尸鬼青白臨時注腦神  
欲訪先生問經訣世間難得自由身

寄處默師

甘露捲簾看雨脚樟亭倚柱望潮頭十年顧我醉中過  
兩地與師方外遊久隔兵戈長寄夢近無書信更堪憂  
香爐烟靄虎溪月綽棹鐵船尋惠休

寄程尊師

鶴信雖然到五湖  
烟波迢遞路崎嶇  
玉書分薄花生眼  
金鼎功遲雪滿鬚  
三秀紫芝勞夢寐  
一番紅槿恨朝晡  
未知朽敗凡間骨  
中授先生指教無

寄無相禪師

老住西峯第幾層  
為師回首憶南能  
有緣有相應非佛  
無我無人始是僧  
爛樵作袍名復利  
鑠金為講愛兼憎  
何如一衲塵埃外  
日日香烟夜夜燈

即事中元甲子

三秦流血已成川塞上黃雲戰馬閒只有羸兵填渭水  
終無奇士出商山田園已沒紅塵內弟姪相逢白刃間  
惆悵翠華猶未返淚痕空滴劒文斑

中元甲子以辛丑駕幸蜀

四首

子儀不起渾瑊亡西幸誰人從武皇四海為家雖未遠  
九州多事竟難防已聞盱食思真將會待畋游致假王  
應感兩朝巡狩跡綵槐端正驛荒涼

其二

爪牙柱石兩俱銷一點淪塵九土搖敢恨甲兵為棄物  
所嗟流品誤清朝幾時睿算殲張角有處愚人載隗囂  
跪望峻山重啓告可能餘烈不勝妖

其三

邪氣奔屯瑞氣移清平過盡到艱危縱饒犬彘迷常理  
不奈豺狼幸此時九廟有靈思李令三川悲憶恨張儀  
可憐一曲還京樂重對紅蕉教蜀兒



其四

白丁攘臂犯長安  
翠輦蒼黃路屈盤  
丹鳳有情塵外遠  
玉龍無跡渡頭寒  
靜憐貴族謀身易  
危惜文王創業難  
不將不侯何計是  
釣魚船上淚闌干

重過隨州故兵部李侍郎恩知因抒長句

莊周高論伯牙琴  
閒夜思量淚滿襟  
四海共誰言近事  
九原從此負初心  
鷗翻漢浦風波急  
雁下鄖溪霧雨深  
慚愧蒼生還有意  
解歌襦袴到如今

隱常在江陵忝故中令白公叨蒙知遇今復重過  
渚宮感事悲身遂成長句

往歲鄴侯鎮渚宮曾將清律暖孤蓬才憐曼倩三冬後  
孰許由基一箭中言重不能轉薄命地寒終是立春風  
鳳凰也合台星折廻首岐山憶至公

故洛陽公鎮大梁時隱得遊門下今之經歷事往  
人非聊抒所懷以傷以謝

孤舟欲泊思何窮曾憶西來值雪中朱履少年初滿座

白衣遊子也從公狂拋賦筆琉璃冷醉倚歌筵玳瑁紅  
今日斯文向誰說淚碑棠樹兩成空

西上

西上青雲未有期東浮滄海去何遲酒闌夢覺不稱意  
花落月明空所思長恐老侵多病日可堪忙過少年時  
關雞走狗五陵道惆悵輸他輕薄兒

西京道中

半夜秋聲觸斷蓬百年身事算成空福生詞賦拋江夏

漢祖精神憶沛中未必他時能富貴只應從此見窮通  
邊禽隴水休相笑自有滄洲一棹風

途中寄懷

不知何處是前程合掌騰騰信馬行兩鬢已衰時未遇  
數峯雖在病相嬰塵埃輩洛虛光景詩酒江湖謾姓名  
試哭軍門看誰問舊來還似禰先生

東歸途中作

松橘蒼黃覆釣磯早年生計近相違老知風月終堪恨

貧覺家山不易歸  
別岸客帆和雁落  
晚程霜葉向人飛  
買臣嚴助精靈在  
應笑無成一布衣

東歸

仙桂高高似有神  
貂裘敝盡取無因  
只將白髮期公道  
不覺丹枝屬別人  
雙闕往來慙請謁  
五湖歸後恥交親  
盈盤紫蟹千卮酒  
添得臨歧淚滿巾

北邙山

一種山前路入秦  
嵩山堪愛此傷神  
魏明未死虛留意

莊叟雖生酌滿巾何必更尋無主骨也知曾有弄權人  
羨他維嶺吹簫客閒傍雲頭看俗塵

西塞山

在武昌界孫吳  
以之為西塞

吳塞當時指此山吳都亡後水孱顏嶺梅乍暖殘粧恨  
沙鳥初晴小隊閒波濶魚龍應混雜壁危猿狖正驕頑  
會將一副寒蓑笠來與漁翁作往還

江州望廬山

東南蒼翠何崔嵬一望橫流幽抱開影寒已令水底去

脚濶欲過湖心來深處不唯容鬼怪暗中兼恐有風雷  
仙人往往今誰在紅杏花香首重回

黃河

莫把阿膠向此傾此中天意固難明解通銀漢應須曲  
纔出崑崙便不清高祖誓功衣帶小仙人占斗客槎輕  
三千年後知誰在何必勞君報太平

汴河

當時天子是閒游今日行人特地愁柳色縱饒粧故國

水聲何忍到揚州  
乾坤有意終難會  
黎庶無情豈自由  
應笑秦皇用心錯  
謾驅神鬼海東頭

皇陂

皇陂漱灩深復深  
陂西下馬聊登臨  
垂楊風輕弄翠帶  
鯉魚日暖跳黃金  
三月窮途無勝事  
十年流水見歸心  
輸他谷口鄭夫子  
偷得閒名直至今

江都

淮王高宴動江都  
曾憶狂生亦坐隅  
九里樓臺牽翡翠



兩行鷓鴣踏真珠歌聽麗句秦雲咽詩轉新題蜀錦鋪  
惆悵晉陽星折後世間兵革地荒蕪

金陵夜泊

冷烟輕靄傍衰藂此夕秦淮駐斷蓬  
棲鳥遠驚沽酒火亂鷗高避落帆風  
地銷王氣波聲急山帶秋陰樹影空  
六代精靈人不見思量應在月明中

中元夜泊淮口

木葉迴飄水面平  
偶停孤棹已三更  
秋涼霧露侵燈下

夜靜魚龍逼岸行  
欹枕正牽題柱思  
隔樓誰轉遶梁聲  
錦帆天子歸魂魄  
應過揚州看月明

渚宮愁思

楚城日暮烟靄深  
楚人駐馬還登臨  
襄王臺下水無賴  
神女廟前雲有心  
千載是非難重問  
一江風雨好閒吟  
欲招屈宋當時魄  
蘭茝荷枯不可尋

春日葉秀才曲江

江花江草暖相偎  
也向江頭把酒杯  
春色惱人遮不得

別愁如瘴避還來安排賤跡無良策裨補明時望重才  
一曲吳歌齊拍手十年塵眼未曾開

漢江上作

漢江波浪綠于苔每到江頭病眼開半雨半風終日恨  
無名無跡幾時迴雲生岸谷秋陰合樹接帆檣晚思來  
對此空慙明聖代忍教纓上有塵埃

遊江夏口

醉別江東酒一杯往年曾此駐塵埃魚聽建業歌聲過

水看瞿塘雪影來黃祖不能容賤客費禕終是負仙才  
平生膽氣平生恨今日江邊首懶迴

官池秋夕

池邊月影間婆娑池上醉來成短歌芙蓉抵死怨珠露  
蟋蟀苦口嫌金波往事向人言不得舊遊臨老恨空多  
松醪作酒蘭為棹十載烟塵奈爾何

貴池曉望

稂莠叅天剪未平且乘孤棹且行行計疎狡兔無三窟

金瓶梅詞話卷三  
三  
羈甚賓鴻欲一生合眼亦知非本意傷心其奈是多情  
前溪好泊誰為主昨夜沙禽占月明

村橋

村橋酒旆月明樓偶逐漁舟繫葉舟莫學魯人疑海鳥  
須知莊叟惡犧牛心寒已分灰無焰事往曾將水共流  
除却思量太平在肯拋疎散換公侯

水邊

野水無情去不回水邊花好為誰開祇知事逐眼前過

不覺老從頭上來窮似孔軻休歎息達如周召亦塵埃  
思量此理何人會蒙邑先生最有才

潮

怒聲洶洶勢悠悠羅剎江邊地欲浮謾道往來存大信  
也知翻覆向平流任拋巨浸疑無底猛過西陵似有頭  
至竟朝昏誰主掌好騎赤鯉問陽侯

塞外

塞外偷兒塞內兵聖君宵旰望昇平碧幢未作朝廷計

白旌猶驅婦女行可使禦戎無上策只應憂國是虛聲  
漢皇第宅秦田土今日將軍已自榮

廣陵春日憶池陽有寄

烟水濛濛接板橋數年經歷駐征橈醉凭危檻波千頃  
愁倚長亭柳萬條別後故人冠劍豸病來知己賞鵲鷯  
清流夾宅千家住會待閒乘一信潮

憶夏口

漢陽渡口蘭為舟漢陽城下多酒樓當年不得盡一醉

別夢有時還重游襟帶可憐吞塞雁風烟好是冷江鷗  
月明更想曾行處吹笛橋邊木葉秋

憶九華

九華巉岵廕柴扉長憶前時此息機黃菊倚風村酒熟  
綠蒲低雨釣魚歸干戈已是三年別塵土那堪萬事違  
回首佳期恨多少夜闌霜露又沾衣

金陵思古

杜秋在時花解言杜秋死後花更繁柔姿曼態葬何處



天紅膩白愁荒原高洞紫簫吹夢想小窓殘雨濕精魂  
綺筵金縷無消息一陣征帆過海門

湘南春日懷古

晴江春暖蘭蕙薰鳬鷺冉冉鷗著羣洛陽賈誼自無命  
少陵杜甫兼有文空濶遠帆遮落日蒼茫密樹礙歸雲  
松醪酒好昭潭靜閒過中流一弔君

臺城

晚雲陰映下空城六代累累夕照明玉井已乾龍不起

金甌雖破虎曾爭亦知霸世才難得却是蒙塵事最平  
深谷作陵山作海茂弘流輩莫傷情

同前

潮平遠岸草侵沙東晉衰來最可嗟庾舅已能窺帝  
室王郎還是御人家山寒老樹啼風雨泉暖枯骸動齒  
牙欲起九原看一遍秦淮聲急日西斜

春日登上元石頭故城

萬里傷心極目春東南王氣只逡巡野花相笑落滿地

山鳥自憐啼傍人謾道城池須險阻可知豪傑亦埃塵  
太平寺主惟輕薄却把三公與賊臣

維城作

大鹵旌旗出洛濱此中烟月已埃塵更無樓閣尋行處  
只有山川識野人早得鑄金誇范蠡旋聞垂釣哭平津  
舊遊難得時難遇回首空城百草春

經過洛陽城

敗垣危堞跡依稀試駐羸驂弔落暉  
跋扈已成梁冀在

簡書難問杜喬歸由來世事須翻覆未必餘材解是非  
千載昆陽好功業與君門下作恩威

自湘川東下立春泊口阻風登孫權城

吳門此去逾千里湘浦離來想數旬只見風師長占路  
不知青帝已行春危憐壞堞猶遮水狂愛寒梅欲傍人  
事往時移何足問且憑村酒暖精神

登夏州城樓

寒聲獵獵成旗風獨倚危欄悵望中萬里山河唐土地

千年魂魄晉英雄  
離心不忍聽邊馬  
往事應須問塞鴻  
好脫儒冠從校尉  
一枝長戟六鈞弓

過廢江寧縣

縣前水色細鱗鱗  
一為夫君弔水濱  
謾把文章矜後代  
可知榮貴是他人  
鶯偷舊韻還成曲  
草賴餘吟盡解春  
我亦有心無處說  
等閒停棹似迷津

武牢關

楚人曾此限封疆  
不見清陰六里長  
一壑暮聲何怨望

數峯秋勢自顛狂由來四皓須神伏大底秦皇謾氣強  
欲學雞鳴試關吏太平時節懶思量

籌筆驛

拋擲南陽為主憂北征東討盡良籌時來天地雖同力  
運去英雄不自由千里山河輕孺子兩朝冠劍恨譙周  
惟餘巖下多情水猶解年年傍驛流

黃鶴驛偶題

野雲芳草遠籬邊敢對青樓倚少年秋色來催榆塞雁

人心先下洞庭船  
高歌酒市非狂者  
大嚼屠門亦偶然  
車馬同歸莫同恨  
古人頭白盡林泉

蓮塘驛

蓮塘館東初日明  
蓮塘館西行人行  
隔林啼鳥似相應  
當路好花疑有情  
一夢不須追往事  
數杯猶可慰勞生  
莫言來去只如此  
君看鬢邊霜幾莖

商驛樓東望有感

山川去接漢江東  
曾伴隋侯醉此中  
歌遠夜梁珠宛轉

舞嬌春席雪朦朧  
棠遺善政陰猶在  
薤送哀聲事已空  
惆悵知音竟難得  
兩行清淚白楊風

定遠樓

前朝上將定妖氛  
曾築嚴城駐大軍  
近日關防雖弛柝  
舊時欄檻尚侵雲  
蠻兵績盛人皆伏  
坐石名高世共聞  
惟恐亂來良吏少  
不知誰解叙功勲

淮南高駢所造迎仙樓

鸞音鶴信杳難迴  
鳳駕龍車早晚來  
仙境是誰知處所



人間空自造樓臺雲侵朱檻應難到蟲網閒窓永不開  
仔細思量成底事露凝風擺作塵埃

登宛陵條風樓寄竇常侍

亂離時節懶登臨試借條風半日吟只有遠山含暖律  
不知高閣動歸心溪喧晚棹千聲浪雲護寒郊數丈陰  
自笑疎慵似麋鹿也教臺上費黃金

錢塘府亭

新恩別啓館娃宮還拜吳王向此中九牧土田周制在

雨藩茅社漢儀同春生舊苑芳洲雨香入高臺小徑風  
更有寵光人未見問安調膳盡三公

關亭春望

關畔春雲拂馬頭馬前春事共悠悠風欺岸柳長條困  
露浥山花小朵愁信越功名高似狗裴王氣力大于牛  
未知至竟將何用渭水涇川一向流

于越亭

楚水蕭蕭多病身強凭危檻過殘春高城自有陵蕪谷

流水那知越與秦岸下藤蘿陰作怪橋邊蛟蜃夜欺人  
琵琶洲遠江村濶回首征途淚滿巾

宿荊州江陵館

西游象闕愧知音東下荆溪稱越吟風動芰荷香四散  
月明樓閣影相侵閒欹別枕千般夢醉送征帆萬里心  
薜荔衣裳木蘭檝異時烟雨好追尋

河中經過翰林張舍人舊居

行塵不是昔時塵謾向朱門憶侍臣一榻已無開眼處

九泉應有愛才人  
丈餘吐鳳當年詔  
樹想棲鸞舊日春  
從此深恩轉難報  
夕陽衰草淚沾巾

九華山費徵君所居

草堂何處試徘徊  
見說遺蹤向此開  
蟾樹自歸三徑後  
鶴書曾降九天來  
白雲事跡依然在  
青瑣光陰竟不迴  
盡日為君思曩昔  
野泉鳴咽路莓苔

題袁溪張逸人所居

蒲梢獵獵驚差池  
數里溪光日落時  
芳樹文君機上錦

遠山孫壽鏡中眉雞窓夜靜開書卷魚檻春深展釣絲  
若使浮名拘絆得世間何處有男兒

清溪江令公宅

鸞牋象管夜深時曾賦陳宮第一詩  
讌罷風流人不見  
廢來蹤跡草應知  
鶯憐勝事啼空巷  
蝶戀餘香舞好枝  
還有往年金甃井牧童樵叟等閒窺

岐王宅

朱郎平臺隔禁闌貴遊陳跡尚依稀  
雲低雍時祈年去

雨細長楊徒獵歸  
申白賓朋傳道義  
應劉文彩寄音徽  
承平舊物惟君在  
猶寫雕鞍伴六飛

西京崇德里居

進乏梯媒退又難  
強隨豪貴帶長安  
風從昨夜吹銀漢  
淚擬何門落玉盤  
拋擲紅塵應有恨  
思量仙桂也無端  
錦鱗潁尾平生事  
却被閒人把釣竿

西京道德里

秦樹團團夕結陰  
此中莊舄動悲吟  
一枝丹桂未入手

萬里滄波長負心老去漸知時態薄愁來惟願酒杯深  
七雄三傑今何在休為閒人淚滿襟

謁文宣王廟

晚來乘興謁先師松柏淒淒人不知九仞蕭牆堆瓦礫  
三間茅殿走狐狸雨霖狀似悲麟泣露滴還同嘆鳳悲  
倘使小儒名竊立宣教吾道受棲遲

代文宣王答

三教之中儒最尊止戈為武武尊文吾今尚自披蓑笠

爾等何須讀典墳釋氏寶樓侵碧漢道家宮殿拂青雲  
若教顏閔英靈在終不羞他李老君

后土廟

四海兵戈尚未寧漫勞淮海寫儀形九天玄女猶無聖  
后土夫人豈有靈一帶好雲侵鬢綠兩層危岫拂眉青  
韋郎年少知何在案上休看太白經

湘妃廟

劉表荒碑斷水濱廟前幽草閉殘春已將怨淚流斑竹



又感悲風入白蘋八族未來誰北拱四凶猶在莫南巡  
九峯相似堪疑處望見蒼梧不見人

息夫人廟

百雉摧殘連野青廟前猶見昔朝廷一生雖抱楚王恨  
千載終為息地靈蟲網翠鬟終縹緲風吹寶瑟助微冥  
玉顏渾似羞來客依舊無言照畫屏

春日獨遊禪智寺

遠樹連天水接空幾年行樂舊隋宮  
花開花謝長如此

人去人來自不同  
鸞鳳調高何處酒  
吳牛蹄健滿車風  
思量只合騰騰醉  
煮海平陳盡夢中

揚州開元寺閣上

滿檻山川漾落暉  
檻前前事去如飛  
雲中雞犬劉安過  
月裏笙歌煬帝歸  
江感海門帆散出  
地吞淮口樹相依  
紅樓翠幕知多少  
長向東風有是非

登瓦棺寺閣

下盤空跡上雲浮  
偶逐僧行步步愁  
暫憩已知須用意

漸危爭忍不回頭烟中樹老重江晚鐸外風輕四境秋  
懶指臺城更東望鵲飛龍關盡荒丘

春日湘中題嶽麓寺僧舍

蟾宮虎穴兩皆休來凭危欄送遠愁多事林鶯還謾語  
薄情邊雁不回頭春融只待乾坤醉水濶深知世界浮  
欲共高僧話心跡野花荒草奈相尤

甘露寺火後

六朝勝事已塵埃猶有閒人悵望來只道鬼神能護物

不知龍象自成灰  
犀慙水府渾非怪  
燕說吳宮未是災  
還識平泉故侯否  
一生蹤跡此樓臺

秦望山僧舍

巉巉危岫倚滄洲  
聞說秦皇亦此游  
霸主卷衣纔二世  
老僧傳錫已千秋  
陰崖水賴松根直  
蘚壁苔侵畫像愁  
各是病來俱未了  
莫將煩惱問湯休

第五將軍於餘杭天柱觀入道因寄

交梨火棗味何如  
聞說苔川已卜居  
瓦榼尚携京口酒

草堂應寫潁陽書亦知得意須乘鶴未必忘機便釣魚  
却恐武皇還望祀軟輪徵入問玄虛

瓊華觀經故友所居

槐花漠漠向人黃此地追遊跡已荒清論不知蒙叟達  
死交空嘆趙岐亡病來未忍言閒事老去唯應覓醉鄉  
日暮街頭策羸馬一聲橫笛似山陽

題潤州妙善前石羊

傳云吳主孫權與蜀主劉備嘗此置會

紫髯桑蓋此沉吟琅石猶存事可尋漢鼎未安聊把手

楚醪雖滿肯同心英雄已往時難問苔蘚何知日漸深  
還有市廛沽酒客鵲喧鳩聚話蹄涔

題木居士廟

鳥噪殘陽草滿庭此中枯木似人形只應神物長為主  
未必浮槎即有靈八月風波飄不去四時黍稷薦惟馨  
南朝庾信無因賦牢落祠前水氣腥

漂母墳

寂寂荒墳一水濱蘆洲絕島自相親青蛾已落淮邊月

白骨甘為泉下塵  
原上荻花飄素髮  
道旁孤葉碎羅巾  
雖然寂寞千秋魄  
猶是韓侯舊主人

經耒陽杜工部墓

紫菊馨香覆楚醪  
奠君江畔雨蕭騷  
旅魂自是才相累  
閒骨何妨塚更高  
駉驥喪來輕蹇蹶  
芝蘭衰後長蓬蒿  
屈原宋玉憐君處  
幾駕青螭緩鬱陶

三衢哭孫員外

燕戀雕梁馬戀軒  
此心從此更何言  
直將塵外三生命

未敵君侯一日恩  
紅蠟有時還入夢  
片帆何處獨銷魂  
忍看明發衣襟上  
珠淚痕中見酒痕

重過三衢哭孫員外

爛柯山下忍重到  
雙桂樓前日欲殘  
華屋未移春照灼  
故侯何在淚沆瀾  
不惟濟物工夫大  
長憶容才尺度寬  
一慟旁人莫相笑  
知音衰盡路行難

覽晉史

張翰思吳中  
離繪等泣

齊王僚屬好男兒  
偶覓東歸便得歸  
滿目路岐拋似夢



一船風雨去如飛盤擎紫線尊初熟筋撥紅絲鱠正肥  
惆悵中途無限事與君千載兩忘機

詠史

蠹簡遺編試一尋寂寥前事似如今徐陵筆硯珊瑚架  
趙勝賓朋玳瑁簪未必片言資國計只應邪說動人心  
九原郝泚何由起虛誤西蕃八尺金

廣陵秋夜讀進士常修三篇因題

入蜀歸吳三首詩藏于篋笥重於師劒關夜讀相如聽

瓜步秋吟場帝悲景物也知輸健筆時情誰不許高枝  
明年二月春風裏江島閒人慰所思

篋中得故王郎中書

鳳里前年別望郎叮嚀惟恐滯吳鄉勸疎杯酒知妨事  
乞與書題作裹糧革廩未能移海曲縣花尋已落河陽  
九原自此無因見反覆遺蹤淚萬行

往年進士趙能卿嘗話金庭勝事見示叙

會稽詩客趙能卿往歲相逢話石城正恨故人無上壽

喜聞良宰有高情  
山朝佐命層層聳  
水接飛流步步清  
兩火一刀罹亂後  
會須乘興雪中行

月

湖上風高動白蘋  
暫延清景此逡巡  
隔年為別因何事  
半夜相看似故人  
蟾向靜中矜爪距  
兔偃明處弄精神  
姮娥老大應惆悵  
獨倚蒼蒼桂一輪

雪

細玉羅紋下碧霄  
杜門顏巷落偏饒  
巢居只恐高柯折

旅客愁聞去路遙，  
擬凍野蔬和粉重。  
掃庭松葉帶蘓燒，  
寒窓呵筆尋詩句。  
一片飛來紙上銷。

潤州甘露寺看雪上周相公

篩寒灑白亂溟濛，  
祈禱功兼造化功。  
光薄乍迷京口月，  
影交初轉海門風。  
細粘謝客衣襟上，  
輕隨梁王酒盞中。  
一種為祥君看取，  
半禳災沴半年豐。

長明燈

破暗長明世代深，  
烟和香氣兩沉沉。  
不知初點人何在，

祇見當年火至今曉似紅蓮開沼面夜如寒月鎮潭心  
孤光自有龍神護雀戲蛾飛不敢侵

桃花

暖觸衣襟漠漠香間梅遮柳不勝芳數枝艷拂文君酒  
半里紅歌宋玉牆盡日無人疑悵望有時經雨乍淒涼  
舊山山下還如此回首東風一斷腸

梅花

吳王醉處十餘里照野拂衣今正繁經雨不隨山鳥散

倚風疑共路人言  
愁憐粉艷飄歌席  
靜愛寒香撲酒樽  
欲寄所思無好信  
為君惆悵又黃昏

詠白菊

雖被風霜競欲摧  
皎然顏色不低顏  
已疑素手能粧出  
又似金錢未染來  
香散自宜飄綠酒  
葉交仍得蔭蒼苔  
尋思閉戶中宵見  
應認寒窓雪一堆

牡丹

似共東風別有因  
絳羅高捲不勝春  
若教解語應傾國

任是無情亦動人，芍藥與君為近侍。  
芙蓉何處避芳塵，可憐韓令功成後。  
辜負穠華過此身。

其二

虛白堂前牡丹相傳  
云太傅手植在錢塘

欲詢往事奈無言，六十年来此託根。  
香煖幾飄袁虎扇，格高長對孔融樽。  
曾憂世亂陰難合，且喜春殘色尚存。  
莫背欄干便相笑，與君俱受主人恩。

扇上畫牡丹

為愛紅芳滿砌階，教人扇上畫將來。  
葉隨綵筆參差長，

花逐輕風次第開  
閒挂幾層停蛺蝶  
頻搖不怕落莓苔  
根生無地如仙桂  
疑是嫦娥月裏栽

詠繡

一片綠羅輕似水  
洞房西室女工勞  
花隨玉指添春色  
鳥逐金鍼長羽毛  
蜀錦漫誇聲自貴  
越綾虛說價猶高  
可中用作鴛鴦被  
紅葉枝枝不礙刀

言

圭玷由來尚可磨  
似簧終日復如何  
成名成事皆因慎



亡國亡家只為多須信禍胎生利口莫將譏思逞懸河  
惺惺鸚鵡無端解長向人間被網羅

姑蘇城南湖陪曹使君遊

水蓼花紅稻穗黃使君蘭棹汎迴塘倚風荇藻先開路  
迎旆鳬鷺盡著行手裏兵符神與術腰間金印綵為囊  
少年太守勲庸盛應笑燕臺兩鬢霜

送章碣赴舉

華廬歌終別酒催粉闌星彩動昭回久經離亂心應破

乍覩昇平眼漸開  
顧我昔年悲玉石  
憐君今日蘊風雷  
龍門盛事無因見  
費盡黃金老隗臺

上江州陳員外

寒江九派轉城樓  
東下鍾陵第一州  
人自中臺方貴盛  
地從西晉即風流  
舊班久望鸛晴翥  
餘力猶聞虎夜浮  
應恨屬官無健令  
異時佳節阻閒遊

早春巴陵道中

遠雪亭亭望未銷  
岳陽春淺似相饒  
短蘆冒土初生筍

高柳偷風已弄條  
波汎洞庭猿獺健  
谷連荆楚鬼神妖  
中流菱唱泊何處  
一隻畫船蘭作橈

登高詠菊盡

籬畔霜前偶得存  
苦教遲晚避蘭蓀  
能銷造化幾多力  
不受陽和一點恩  
生處豈容依玉砌  
要時還許上金罇  
陶公沒後無知己  
露滴幽叢見淚痕

淮南送盧端公歸臺

鸞凰勢逸九霄寬  
北去南來任羽翰  
朱紱兩驂王儉府

繡衣三領杜林官道從上國曾匡濟才向牢盆始重難  
應筴張綱謾生事埋輪不得在長安

暇日感懷因寄同院吳蛻拾遺

壁池清秩訪燕臺曾捧瀛洲扎翰來今日二難俱大夜  
當時三幅謾高才戲悲槐市便便笥狂憶樟亭滿滿杯  
猶幸小蘭同舍在每因相見即銜哀

安陸贈徐礪

靈蛇橋下水聲聲曾向橋邊話別情一榻偶依陳太守

二年深憶禰先生  
塵欺鬢色非前事  
火蒸蓬根有去程  
還把餘杯重相勸  
不堪秋色背鄖城

送劉校書之新安寄吳常侍

野雲如火照行塵  
會績溪邊去問津  
才子省銜非末客  
使君科第是同人  
狂思下國千場醉  
病負東堂兩度春  
他日酒筵應見問  
庾裘漁艇隔朱輪

重九日廣陵道中

秋山抱病何處登  
前時韋曲今廣陵  
廣陵大醉不解悶

韋曲舊遊堪拊膺佳節縱饒隨分過流年無奈得人憎  
却驅羸馬向前去牢落路岐非所能

粉

每持纖白助君時霜自無慘雪自疑郎若姓何應解傳  
女能窺宋不勞施粧成麗色唯花妒落盡啼痕只鏡知  
最好玉京仙署裏更和秋月照瓊枝

晚眺

凭古城邊眺晚晴遠村高樹轉分明天如鏡面都來淨

地似人心總不平  
雲向嶺頭閒不撒  
水流溪裏太忙生  
誰人得及莊居老  
免被榮枯寵辱驚


野花

萬點紅芳血色殷  
為無名字對空山  
多因戲蝶尋香住  
少有行人輟櫂攀  
若在侯門看不足  
為生江岸見如閒  
結根畢竟輸桃李  
長向春城紫陌間

曲江春感

江頭日煖花又開  
江東行客心悠哉  
高陽酒徒半凋落

終南山色空崔嵬聖代也知無棄物侯門未必用非才  
滿船明月一竿竹家在五湖歸去來





羅昭諫集卷三